



Messadi per la radunanza communal digls 11 da december 2025

Stimadas votantas e stimos votants

I suondan infurmaziuns davart las tractants tgi vignan cunsigleidas e relaschedas alla radunanza communal digls 11 da december 2025.

Tractanda 3

Protocol dalla radunanza communal digls 22 d'avost 2025

Igl protocol dalla radunanza communal digls 22 d'avost 2025 è sto exponia tenor art. 29 dalla constituziun communal digls 5 da settember 2025 anfignen igls 6 d'otgover 2025 per invista ainten la canzleia communal e mess ainten la reit sen la homepage. Ainfer igl termin d'exposiziun èn neidas inoltradas nignas reclamaziuns. Uscheia vign igl protocol approvo e sottascretg digl president communal e dall'actuara.

Tractanda 4

Brinzauls: Sanaziun «Tgant dalla bova Vasarauls»

Aint igl cumegn Albula/Alvra aint igl territori tranter Vasarauls e Brinzauls traversan en conduct da pressiuon d'ava scu er lengias electricas (electricitad e communicaziun) la bova da Brinzauls. Igls muvimaints dalla bova on piglia tiers marcantamaintg durant igls davos 20 onns. Chegl ò la conseguenza, tgi vignan caschunos mintg'onns ots costs da mantignamaint pigl provedimaint dad ava ed electricitad scu er ve dalla veia communal.

Or da chel muteiv èn igl onn 2020 neidas realisadas differentas maseiras segl li. Uscheia è neida fatga ena correcziun dalla veia, tar la quala la stiarta dalla Voia Sallera è neida spustada dafor igl taragn da bovas. Ultra da chegl èn las lengias dad ava e dallas ovras electricas neidas spustadas an ena stgaffa da lenn survart la Voia da Vasarauls. Aint igl sectour dalla sbova èn las lengias dad ava neidas ramplazzadas tras uders da pumpiers flexibels. Tenor basigns son neir agiuntos ulteriours

uders per prolongar chels. Las lengias dallas ovras electricas èn neidas cumpletta-
das cun ena lantscha da cabel, uscheia tgi pon neir tratgs aint tot tenor basigns ulte-
riours cabels.

Siva da chellas lavours da construcziun ò igl territori puspe sa mido fitg. Siva dalla
sbova dall'insla igls 16 da zarcladour 2023 passa igl antier traffic public e per part er
igl traffic privat sur la Voia da Vasarauls. A fundamaint dall'ota spertezza dalla bova
da radond 3 m ad onn (stadi schaner 2025) ò la stgaffa da lenn tg'era neida con-
strueida stuia neir allontanada, uscheia tgi las lengias passan ossa sur tera sen es-
sas da lenn e vignan schurmagedas tras tola ondulada mez radonda. Antras la sbo-
va constanta èn er igls tumbigns gio sverschias fitg, las lengias èn curt avant sgli-
schier sen la veia e la scarpa sa stompla scu ena lavegna an direcziun dalla veia.

Per chella raschung ò igl cumegn Albula/Alvra do l'incumbensa da far en studi davart
la realisabladad. Tar chel èn neidas retschartgedas differentas variantas, las qualas
duessan sierar er aint igl futur la sierezza digl provedimaint. Resultond dalla cumpa-
raziun dallas variantas è neida tscharneida la miglra varianta, tgi ò la miglra relaziun
digls costs e digl gudogn scu er en mantignamaint minim.

Per tgi stetta a disposiziun ena gronda zona da paracolp per ena siertad digl prove-
dimaint schi lunga scu pussebel scu er la reducziun digl mantignamaint dalla veia,
duess neir fatga ena gronda demontascha da maximalmaintg 7'000 m³. An connex
cun chella demontascha duess la Voia da Vasarauls neir adattada allas cundiziuns
dad oz. Igl schurmetg mecanic supplementar dallas lengias vign venavant garantia
antras l'utilisaziun da tola ondulada.

Igls dus tumbigns èn cupitgias aint igl decurs digls onns e ston uscheia neir biagias
da nov. Las lengias per l'ava da beber e per l'electricidad duessan neir manadas
venavant sur tera. La lengia dall'ava da beber duess mantigneir la sia flexibladad cun
en uder plat DN 100.

Las lengias d'electricidad existentas restan mademas, cunchegl tg'èn avant mang
avonda reservas da cabels. En ramplazzamaint dallas lengias è actualmaintg betg
basignevel.

Per precauziun vignan mess conducts per la protecziun da cabels adattos anfignen
segl manivel dallas lengias existentas digls tumbigns tgi ston neir biagias da nov.
Chella maseira serva alla preparaziun per ena colliaziun eventuala an cass d'en
evenimaint nunspitgia. An en tal cass son las lengias neir collieidas e ramplazzadas
spertamaintg.

Cun la construcziun nova digl aquaduct scu er cun las lavours d'adattaziun ve dallas
lengias dallas ovras electricas so la sierezza digl provedimaint neir garanteida per
varsaquants ulteriours onns. Igls costs stimos importan radond CHF 850'000.00 (incl.
TPV). L'antschatta dallas lavours da construcziun è preveida per la premaveira
2026. La stad 2026 duessan las lavours neir fittadas.

La suprastanza communal propona d'approvar igl credit brut da CHF 850'000.00 (incl. TPV) per la sanaziun digl tgant dalla bova da Vasarauls.

Tractanda 5

Brien/Brinzauls: Planisaziun translocaziun – Credit da planisaziun

A caschung dalla situaziun da risc duess neir pussibilito a persungas da Brinzauls dad eir davent da Brinzauls. Igl cumegn Albula/Alvra è vedlonder da parager en project forestal per la translocaziun da bietgs ed installaziuns tgi sa cattan a Brinzauls an lis sieirs. Chella intenziun sa basa sen las ancunaschientschas ed igls fundaments digl project da translocaziun, igl qual è nia relascha igls 7 da matg 2021 dalla radunanza communal digl cumegn Albula/Alvra.

Cuntign digl project e fegnameira

Igl è la fegnameira digl project dad elaborar, a consideraziun agl svilup dalla sbova da Brinzauls, schliaziuns per la siertad da bietgs ed infrastrukturas periclitadas e da dislocar an cass da basigns immobiglias pertutgeidas an lis adattos. Tot tenor igl svilup dalla situaziun dalla sbova da Brinzauls ed an dependenza digls basigns dalla populaziun pertutgeida, tgi ò gia la pussebladad da s'annunztgier per ena translocaziun preventiva anfignen igls 30 da settember 2025, pon esser basignevels differents scenaris, cass e variantas da translocaziun.

Finanziaziun e credit da planisaziun

Igl costs totals pigl project da translocaziun son betg anc neir stimos fidadamaintg, percheigl tg'els varieschan fitg tot tenor scenari, cass e varianta dalla translocaziun. Per la finanziaziun digl project da translocaziun ò la regenza dumando agl cunsegl grond digl cantun Grischun en credit d'obligaziun da 50 milliuns brut (corresponda a costs totals da 55.6 milliuns francs).

Per tgi las lavours da project possan neir manadas anavant e concretisadas davart digl cumegn e dalla gruppa da labour dalla translocaziun scu er digl sarvetsch giuridic digl cumegn, dumonda la suprastanza communal en credit da planisaziun da CHF 390'000.00.

Chel credit duess finanztgier las labour dalla gruppa da labour dalla translocaziun scu er igl accumpognamaint giuridic basignevel a norma dachel project complex. Las speisas an otezza da CHF 390'000.00 corran aint igl project general dalla translocaziun e vignan cofinanztgeidas proporziunalmaintg dalla confederaziun e digl cantun. La suprastanza communal chinta cun ena garanzeia da contribuziun da 90%.

La suprastanza communal propona d'approvar igl credit brut da CHF 390'000.00 (incl. TPV) per las lavours da project.

Tractanda 6

Preventiv 2026 digl cumegn Albula/Alvra

Tenor las ordinaziuns dalla constituziun communal Az preschentagn nous igl preventiv pigl onn 2026. La supranza communal ha tracto igl preventiv 2026 ed igl relaschea per mangs dalla radunanza communal. El sa basa sen en pe da taglia da 100%, sen igl rendachint 2024, igl qual è termino ed approvo scu er sen igl rendachint 2025, igl qual n'è betg anc termino. Pinavant èn neidas risguardadas scu basa las expensas ed antradas legitimas, las indicaziuns digls departaments tenor lur prioritads scu er la planisaziun dallas finanzas 2025-2030.

Brien/Brinzauls

La «Bova da Brinzauls» caschungia siva da varsaquants onns expensas extraordinarias. An chel connex ègl fitg grev da stimar davantor las expensas. Correspondentamaintg cuntigna igl preventiv fitg bleras malsiertads. Surtot pògl dar divergenzas digl preventiv tar las posiziuns suandontas:

- cunsegliaziun giuridica dalla translocaziun / scumond d'utilisaziun
- adattaziun digl pensum digl presidi communal
- stab directiv communal / maseiras d'evacuaziun
- amortisaziun digls costs restants da singuls projects

Preventiv digl chint economic 2026

Tar expensas totalas da CHF 19'433'400 ed en profit total da CHF 18'577'300 mossa igl preventiv 2026 en surple d'expensas da CHF 856'100 aint igl chint economic (preventiv 2025 CHF 724'300). Aint igl resultat total èn cumpigleidas amortisaziuns da CHF 1'163'800 sen la facultad administrativa, deposits ainten fonds/finanziaziuns spezialas da CHF 224'500 (ovra electrica reit ed igl commerzi cun electricitad) e prelevaziuns da fonds/finanziaziuns spezialas da CHF 348'900 (provedimaint d'ava, serenaziun, gestiun digl rusment). Chegl dat ena autofinanziaziun (cashflow) da CHF 183'300 (preventiv 2025 CHF 259'500).

Las suandontas infurmaziuns servan alla explicaziun dallas differenzas essenzialas da singulas posiziuns an cumparaziun cugl preventiv 2025:

• 0 Administraziun generala

An cumparaziun cugl preventiv 2025 cumportan igls costs supplementars per l'administraziun generala radond CHF 167'000. Igls costs supplementars sa laschan surtot explitgier cun las expensas per la «bova da Brinzauls» e cun l'adattaziun dalla organisaziun communal/restructuraziun digl camp operativ.

• 1 Siertad publica

Igls costs supplementars an cumparaziun cugl preventiv 2025 da CHF 116'000 sa mettan ansemen da ples posiziuns (pulizeia, pumpiers, sanaziun da dabets vigls digl implant da teir). Per las prestaziuns digl stab directiv communal e las maseiras an connex cun l'evacuaziun èn previas costs supplementars da radond CHF 80'000.

- **2 Educaziun**

Igls costs per l'educaziun èn ainten las limitas digl onn passo.

- **3 Cultura, sport, taimp liber, baselgia**

Igls costs nets pigl sectour cultura, sport, taimp liber, baselgia sa sminuescha an cumparaziun cuagl onn passo per radond CHF 107'000.

Las expensas per la cultura èn radond CHF 23'000 pi passas tgi aint igl preventiv 2025. Igls costs pi bass sa laschan explitgier antras las expensas per la festa da giubileum dalla fusiun tgi ò gia li igl onn 2025. Costs supplementars da CHF 25'000 èn previas per contribuziuns ad organisaziuns privatas. Tigl sport èn costs pi bass da CHF 20'000 previas per contribuziuns ad organisaziuns privatas.

Pinavant sa laschan giustifitgier igls costs nets pi bass pigl sectour digl taimp liber antras ena contribuziun messa an vista per las speisas per la restructuraziun ed igl mantignamaint dallas plazzas da giuier scu er da costs pi bass per las sendas da viandar.

- **4 Sanadad**

Igls costs pigl sectour da sanadad èn ainten las limitas digl onn passo.

- **5 Siertad sociala**

Igls costs supplementars da radond CHF 29'000 èn d'attribueir agl carschamaint da costs per la tgira d'unfants complementara alla famiglia ed ageids economics (sustigns).

- **6 Traffic**

Igls costs pigl sectour da traffic èn ainten las limitas digl onn passo.

- **7 Protecziun digl ambiaint e planisaziun territoriala**

Igls costs restants previas per las construcziuns da protecziun an connex cun la «bova da Brinzauls» schean cun radond CHF 96'000 sot igl nivel digl onn passo.

Igl è da risguardar, tg'igls costs per la gruppa da labour da translocaziun e da lour cunsegliaziun giuridica scu er per la realisaziun digl project da translocaziun n'eran betg anc ancunaschaints digl tottafatg igl mument dalla budgetaziun (otgover 2025) e tg'èn correspondentamaintg betg nias budgetos.

Tar las finanziaziuns spezialas **provedimaint d'ava** e **serenaziun** èn budgetadas aint igl preventiv 2026 prelevaziuns da CHF 92'400 respectivamaintg CHF 167'500 digls contos d'impegn correspondents, per pudeir cuatar igls costs da gestiun currents. Igls costs da gestiun on er igls davos seis onns (2019-2024) betg savia neir cuatos antras taxas lieidas ad en intent aint igl camp digl provedimaint d'ava e serenaziun. Las prelevaziuns digls contos d'impegn on importo an chella perioda an me-

dia pigl provedimaint d'ava radond CHF 120'000 e per la serenaziun radond CHF 100'000 ad onn.

An vista a chel svilup ègl da controllar igls onns tgi vignan igls costs da gestiun risguardond las speisas an connex cun la «bova da Brinzauls» scu er las taxas d'ava e las taxas per avas persas annualas lieidas alla destinaziun prescretga. Ena adattaziun dallas taxas a partair digl onn 2027 è inevitabla.

8 Economia publica

La participaziun agls costs alla associaziun "Forst Albula" s'augmanta scu consequenza d'en dulzamaint digl plan da plazzas e dalla compra d'en vehichel per radond CHF 88'000. Segl camp turissem ègl da spitgier costs supplementars da radond CHF 44'000. Igls costs supplementars èn surtot d'attribueir alla veia d'ava ansaina.

• 9 Finanzas

A fundamaint dalla revisiun parziala dalla lescha da taglia digl cantun Grischun vignan las famiglias discargadas pi fitg aint igl avigneir. Pigl onn 2026 è nia risguardo aint igl preventiv ena reducziun dallas taglias d'antrada e da facultad da CHF 50'000 an cumparaziun cun igl preventiv digl onn avant. Pero èn neidas budgetadas antradas supplementaras da CHF 100'000 tar las taglias sen gudogn e capital dallas persungas giuridicas. Igl gudogn net dallas taglias communalas generalas è uscheia per CHF 50'000 pi ot, an cumparaziun cun igl preventiv digl onn 2025.

Tar l'angulivaziun da finanzas (angulivaziun da resursas e dalla grevezza dallas muntognas) èn neidas risguardadas las antradas supplementaras da CHF 125'000, communitgeidas digl cantun. Antradas damanc ègl da spitgier tar las immobiglias ainten la facultad finanziaria. Per l'egna sa redutgeschan las renditas da locaziun per radond CHF 50'000 per Brinzauls e l'Ustareia da Mon. Per l'otra èn previas costs supplementars da radond CHF 50'000 pigl mantignamaint dallas immobiglias.

Preventiv digl chint d'investiziuns 2026

Suandontamaintg ena survista dallas investiziuns preveidas pigl onn 2026, tenor credits d'obligaziun gio concludias antras la radunanza u la suprastanza communal. Las investiziuns planisadas, per las qualas i mantga anc l'approvaziun legala tigl conclus digl preventiv, èn neidas pigleidas se cun ena clausula da bloccada (*) (tenor art. 19 dalla lescha davart las finanzas).

Igl chint d'investiziuns prevei investiziuns bruttas da CHF 17'365'000, dallas qualas CHF 11'315'000 èn preveidas per la realisaziun digls projects an connex cun la «bova da Brinzauls». Tratg giu las contribuziuns e las taxas da colliaziun da totalmaintg CHF 13'564'000 restan investiziuns nettas an en'otezza da CHF 3'801'000.

Cun l'autofinanziaziun budgetada (cashflow) da radond CHF 183'000 resulta en deficit da finanziaziun da CHF 3'617'700.

Las suandontas investiziuns èn cumpigleidas aint igl preventiv:
dessignaziun digl project

investiziuns nettas

sanaziun dalla veia dalla staziun a Surava		30'000
*sanaziun digl tgant dalla bova Vasarauls Brinzauls		850'000
*staziun a Casti terminal da postas cun piazza da volver		200'000
sanaziun aquaduct rampar Surava		180'000
schurmetg da crudada da crappa Surava	1'700'000	
- contribuziun d'investiziun	- 1'530'000	170'000
sbova Brinzauls examinaziun successiva	250'000	
- contribuziun d'investiziun	- 238'000	12'000
sbova Brinzauls galareia da drenascha	10'000'000	
- contribuziun d'investiziun	- 9'150'000	850'000
sbova Brinzauls sarvetsch da preavertimaint 2025-2028	875'000	
- contribuziun d'investiziun	- 788'000	87'000
*sbova Brinzauls planisaziun digl project da translocaziun		190'000
angrondamaint dalla avertura digl gôt Mon	800'000	
- contribuziun d'investiziun	- 552'000	248'000
*SIE 2026 Gôt Spess/Gôt da la Dascha Alvaschein	540'000	
- contribuziun d'investiziun	- 367'000	173'000
*SIE 2026 Igls Plangs-Plang Turigns Brinzauls	700'000	
- contribuziun d'investiziun	- 504'000	196'000
*cumbat dad arsas da gôt li da prelevaziun dad ava Alvagni	450'000	
- contribuziun d'investiziun	-370'000	80'000
project „Landwasserwelt“		450'000
staziun da trafo dalla colonia d'abitar Prada, ramplazzamaint digl stabilimaint MS + NS		150'000

*Igls projects marcos cun * èn provedias cun la clausula da bloccada „resalva dalla approvaziun da credit alla radunanza communal“. Els restan bloccos, anfignen tgi la basa legala è eida an vigour.*

Ulteriouras infurmaziuns davart igl preventiv 2026 digl chint da gudogn e sperdita e digl chint d'investiziuns pon neir ligeidas sen la website digl cumegn (versiun de-tagleda). A caschung dalla radunanza communal vignan detagls anc explitgias a bucca antras igl mastral.

La suprastanza communalà propona d'approvar igl preventiv pigl onn 2026.

Tractanda 7

Pe da taglia 2026 digl cumegn Albula/Alvra

Cun l'acceptaziun digl contract da fusiun è igl pe da taglia digl cumegn Albula/Alvra nia fixo sen 100% dalla taglia cantunala simpla. Sa basond sen igl preventiv 2025 tg'è nia approvo alla radunanza communalà digls 4 da december 2024, sen igl rendachint 2024 tg'è saro giu ed approvo scu er sen las investiziuns planisadas pigl 2026, propona la suprastanza communalà Albula/Alvra, da lascher igl pe da taglia 2026 venavant sen 100% dalla taglia cantunala simpla.

Tractanda 8

Casti plus: Incarica dalla concessiun e prolungaziun digl termin da construcziun

L'ovra electrica digl martgea da Turitg (ewz), la Axpo Power AG (anteriouramaintg Axpo AG) e la EWD Elektrizitätswerk Davos AG on fundo en consorzi «Casti plus», cun l'intenziun da projectar en'ovra da curs a pressiuin bassa «Casti plus», la quala fò adiever dall'Alvra d'avent d'ena otezza da ca. 844 m s. m. anfignen en'otezza da ca. 825 m s. m.

La radunanza communalà digl anteriour cumegn da Casti ò concedia igls 13 da settember 2010 agl consorzi la concessiun pigl gioldamaint dalla forza hidraulica ainten l'ovra electrica Casti plus. La regenza ò concedia la concessiun igls 28 da favrer 2012. Ainten la decisiun dall'approvaziun ò ella fixo, tgi las lavours da construcziun stoptgan avoir antschet igl pi tard ainfer tschintg onns siva dalla vigour legala, chegl monta anfignen igls 28 da favrer 2017. Cun vigour sen igl ampren da schaner 2015 ò igl cumegn da Casti fusiuno cun las vischnancas Alvagni, Alvaschagn, Brinzauls, Mon, Stierva e Surava agl cumegn Albula/Alvra.

Igls 16 da settember 2010 on las parteidas fixo en contract davart la participaziun digl cumegn alla societad per l'ovra electrica «Casti plus» ed ulteriouras prestaziuns.

La construcziun dall'ovra electrica ò sa tratg alla lunga, percheigl tgi la realisaziun dependa digl sclarimaint dalla sburflada e deflussiun dall'ava tar l'ovra electrica dalla Albula Landwasserwerke AG (ALK). Chegl ò gia per consequenza, tg'igl termin dallas lavours da construcziun è scrudo igls 28 da favrer 2017 tenor cefra 3 dalla concessiun pigl scumanzamaint dallas lavours da construcziun.

Siva da novas contractivas èn las parteidas sa cunvigneidas avant la scadenza digl termin dallas lavours da construcziun, da prolungar igl termin dallas lavours da construcziun tenor cefra 3 dalla concessiun e d'adattar la cefra 2 pertutgont la participaziun digl cumegn alla societad tgi stò neir fundada scu er la cefra 5 pertutgont igl da-

ner da spetga aint igl contract digls 16 da settember 2010 an chel senn, uscheia tg'igl cumegn survign anstagl digl daner da spetga igl dretg d'ena participaziun alla societad anonima tgi stò anc neir fundada per 0,15 punct procentual ad onn per mintga onn da spetga daple. Ena cunvignientscha lionta è pero mai neida stipulada. Igl cumegn Albula/Alvra ò approvo igls 12 d'otgover 2018 ena prolungaziun digl termin dallas lavours da construcziun anfignen igls 28 d'avost 2024. La regenza digl cantun Grischun ò accepto igls 5 da favrer 2019 l'adattaziun digl termin dallas lavours da construcziun.

L'examinaziun d'ena schliaziun dalla problematica dalla sburflada e deflussiun dall'ava dall'ovra electrica dalla ALK è puspe sa tratga alla lunga. Anfignen oz èn las cundiziuns da basa e l'ampurmischung dalla finanziaziun dalla sanaziun dalla sburflada e deflussiun dall'ava avertas. Chegl ò gia la conseguenza, tg'igl termin dallas lavours da construcziun tg'era nia prolongo anfignen igls 28 d'avost 2024, n'ò betg savia neir observo. Uscheia ò igl consorzi stuia dumandar agl cumegn ena sagonda geda per ena prolungaziun digl termin da construcziun anfignen igls 30 d'avost 2029.

Dantant on las cundiziuns da basa economicas per la realisaziun dall'ovra electrica sa pigiuro anavant. La Axpo Power AG e la EWD Elektrizitätswerk Davos AG on sa decidia da bandunar igl consorzi, percheigl tg'els na creian betg ple ve d'ena realisaziun dall'ovra electrica sot cundiziuns economicas purtablas. Igl ewz vesa anc tscher-tas pussebladads da realisar l'ovra electrica sot cundiziuns stgersamaintg economicas, schinavant tg'igls costs sa laschan sminueir. Sot chellas cundiziuns ò igl ewz igl intent da sviluppar anavant igl project anfignen tar la madiranza da construcziun.

La Axpo Power AG, la EWD Elektrizitätswerk Davos AG ed igl ewz èn nias peregrina davart la schliaziun digl consorzi e l'incarica da tot igls dretgs ve digl project scu er dall'incarica dalla concessiun digl consorzi agl ewz.

Igl contract digls 16 da settember 2010 vign adatto e singulas determinaziuns vignan ramplazzadas (aggiunta agl contract existent).

- Sot la cundiziun tgi l'ovra electrica vigna biageida, conceda igl ewz agl cumegn igl mument tg'ella vign messa an funcziun, en dretg gratuit sen ena participaziun an otezza da 5 % alla societad anonima tg'ò anc da neir fundada. Chella participaziun corresponda ad ena valeta nominala d'aglmanc CHF 350'000.00. Chel dretg da participaziun s'augmanta per mintga antier onn da spetga per 0.15 punct procentual a parteir digl mument dalla scadenza digl termin dallas lavours da construcziun digls 28 da favrer 2017, chegl vot deir, a parteir digl amprem da mars 2017, anfignen tigl scumanzamaint dallas lavours da construcziun per l'ovra electrica Casti plus. Per en onn antschet vign en'augmentaziun dalla participaziun chintada pro rata temporis.

Igl ewz vign a liberar igl capital d'aczias e surdar gratuitamaintg agl cumegn las aczias dallas qualas el ò igl dretg.

Ultra da chegl ò igl cumegn l'opziun d'augmentar la sia participaziun alla societad anonima anfignen a 15 % ainfer tschintg onns siva dalla messa an funcziun dall'ovra electrica. Chel dretg da participaziun sa sminuescha an chella dimensiun, scu tg'igl cantun Grischun sa participescha alla societad. Igl prietsch d'acquist corresponda tar la messa an funcziun dall'ovra electrica alla valeta nominala dallas aczias plus 5 %. Sessour s'augmainta igl prietsch d'acquist mintg'onn per mintgamai ulteriours 5 %.

Per cass tg'igl ewz renunztga alla fundaziun d'ena societad anonima comunabla e fò sez adiever dalla forza hydraulica amprestada, vign igl ewz ad indemniser igl cumegn pigl sies dretg ad ena participaziun gratuita tenor cefra 2 al. 1 digl contract.

- Igl daner da spetga, tg'è nia stipulo aint igl contract digls 16 da settember 2010 vign stritgia sainza cumpensaziun.
- Igl consorzi paia agl cumegn pigl tractamaint dalla dumonda per ena prolungaziun digl termin ena taxa administrativa da CHF 25'000.00. I vign renunztgia agl incassamaint d'ena taxa da concessiun unica tenor art. 31 BWRG.
- Las stipulaziuns restantas digl contract digls 16 da settember 2010 restan numidadas an vigour, schigliunsch scu tgi vignan betg midadas antras la conclusiun digl supplement.

La suprastanza communal dumonda d'approvar igl supplement agl contract tranter igl cumegn Albula/Alvra e l'ovra electrica digl martgea da Turitg pertutgont las participaziuns alla societad per l'ovra electrica «Casti plus» ed ulteriouras prestaziuns.

Tractanda 9

Lescha federala davart igl acquist da taragn antras persungas aint igl exterior: quota communal

Tenor art. 10 dalla lescha introductiva cantunala per la LAIE (EGzBewG; BR 217.600) fixescha la regenza mintg'onn an risguard agl conclus communal, an tge moda tg'igl contingent cantunal da concessiuns vign repartia. Igls cumegns vignan supplitgias da communitgier la regulaziun digl acquist da taragn antras persungas aint igl exterior vavevla a partair digls amprem da schaner 2026 agl inspectorat digl register funsil e register da commerzi.

La suprastanza communal Albula/Alvra propona da lascher venavant la quota pigl cumegn Albula/Alvra tar 100 %.

Casti, igls 20-11-2025

La supranstanza communalala Albula/Alvra